



Uunga siunnersuut: Aatsitassat pillugit ingerlatallu tamatumunnga pingaarutillit pillugit Inatsisartut inatsisaata (aatsitassanut ikummatissanullu inatsit) allanngortinneqarnissaa pillugu Inatsisartut inatsisaat nr. xx, xx. xxx-imeersoq. (Piiaanissamut akuersissummik pissarsinissamut tunngavissarititaasunut piumasaqaatit allanngortinneqarnerat aamma sumiiffiit piiaanissamut akuersissummi pineqartunut ilaasut illersorneqarnissaat)
(Aatsitassanut Suliffeqarnermullu Naalakkersuisoq)
(Siullermeerneqarnera)

Sukkanerusumik sullissineq, periaaseq one door inatsisiliornerlu akimut ersittoq. Tassaapput pissutsit pingasut Demokraatinit ukiorpassuarni piumaneqarsimasut aatsitassanik piiaaneq eqqartorneqartillugu, tassungalu tunngasunik inatsisinik eqqartuinnermi.

Nuannaarnarporlu Naalakkersuisut matumuuna inatsisinut atuuttunut allannguutissatut siunnersuummini piiaanissamut akuersissummik pinissaq ajornaannerulertissammassuk, tassungalu atatillugu piiaanissamut akuersissummik piginnittoq aningaasaliisimanagera isumannaannerulertillugu.

Nuannaarnarpoq imminut akilersinnaassutsimik misissuinnermik annertuumik aningaasartuuteqarfiusartumik, pininnaatitsissummik pigisaqartut Naalakkersuisunut akuerineqartussanngorlugu nassiussissasut piumasaqaateqarfigineqarunnaassammat. Tassami aningaasaliisoq aningaasanillu atukkiisup kisimik nalilersinnaavaat aatsitassanik piiaaniarluni pilersaarut imminut akilersinnaanersoq, taamaalillutillu aningaasalersorusunnerlugu.

Taamaalisukkut tunngaviumik qajassuuttumik pininnaatitsissummik pigisaqartut piiaanissamut akuersissummik peqartut, piffissami akuersissuteqarfiusumi sumiiffimmi piiaanissamut akuersissummi pineqartunut aatsitassarsiorluni ingerlatanik suliaqarnissamut siunnersuummi kisermaassisussaatitaalerput. Atuisussat kingulliullutik piiaaffissamut takkussimasut unammillerneratigut, sumiiffimmi akuersissuteqarfiusumi atuisussap annertuumik aningaasaliiffigisimasaanut pininnaatitaaffii ajornerulersinnaveersaarnissaat pingaaruteqarluinnarpoq.

Kalaallit nunaanni aatsitassanik piiaaniaraanni inatsisit paasiuminartuunissaat, atuisussallu suliffeqarfinni nunanilu allani aatsitassarsiornermi suittuusuni atugassarititaasut pitsaassuserlu assigalugit assigiimmik atugassaqartinnissaat pisariaqarpoq.

Ilutigalugu Demokraatit Naalakkersuisut kaammattoqqikkusuppai pisortani allaffissornermi one-door periaaseq atorneqartuassammat. Suliffeqarfiit namminersornerullutik oqartussanut saaffiginninnermi



immikkoortortamik attavigineqarsinnaasumik suliffiullu sullinneqarnerata nalaani naammassinissaatalu tungaanut suleqataasinnaasumik peqartariaqarmat.

Sullinneqarneq ajornaatsuunerusariaqarpoq isumannaatsuunissamut piumasaqaatit sullinneqarnerulli pitsaassusaa ajornerulertingikkaluarlugit. Pisortat inatsisini piumasaqaateqartariaqarput, kisiannili pisortat aamma ilumini sullinneqarneq pitsaanerpaamiitsinnissaanut piumasaqaateqartariaqarput, suliffiit qinnuteqarnermi Namminersornerullutik oqartussani allaffinnut assigiinngitorpassuarnut saaffiginnittaangikkaluarlutik sullinneqarsinnaanngoqqullugit.

Taamaalisukkullu sullinneqarneq ullumikkumiit sukkanerusariaqarpoq. Ullumikkut sullinneqarnermi piffissaq atorpeqartartoq Kalaallit nunatta tatiginassusaa ulorianartorsiortitsivoq. Tassani pineqarpoq sullissinerup sivilissusaa, politikkikkullu allanngujuissuseq tassani aamma apeqqutaasorujuusarluni. Allaffissornikkut sullissineq ukiorpassuarnik sivilissuseqaraangat aningaasaliisussat politikkikkut qanoq akulikitsigisumik allannguisoqartarnerisigini alertarpaat. Taamaammatt sullissineq illersorneqarsinnaasumik atugassaqaartitsisariaqarpoq sukkanerusariaqarporli.

Demokraatinit taamatut oqaaseqarluta Naalakkersuisut allannguutissatut siunnersuutaat taperserlugu Inuussutissarsiornermut Aatsitassarsiornermullu ataatsimiititaliamut suliarineqarnissaanut innersuupparput.